

# COLOSSIANS

---

**Paul-hu Colossae ekaresia jejëmijade jöhoje.**

**1** <sup>1-2</sup>O asë'e God-are aribövi Colossae amore raromarujohumë birivoromo Keriso uehorovaruje ö mueno'e jëve hu'o gemuore bimumorovë'ëro. God-ro nimamu Iesu Keriso-are apostle jevë'ëro Paul na'o nosi öho Timothy'o noro jemesi örire jejëmijö. No nague God nosi Vavuohuro huë baeromo ajëmijego maro raromo'irarijego.

**Paul-hu Colossae ekaresia jabesi jöëni uehorovoromo  
God rajahiromo ëninamade jöhoje.**

<sup>3</sup>Jemëni uehorovoromo pari vaejë'iroho noro God nosi Bada Iesu Keriso-are Vavu hesi örire huë mae uavarueje. <sup>4</sup>Rabëni hesi bëhoho iae no hejareje uvavamu: Colossae aribövioho jemëro Iesu Keriso mae uehorovë'i God-are aribövie aho'obëhe huë baejëvaruje höjo. <sup>5</sup>Jemë ëhi ë'aruje hesi bëhoho jemëro uvarujeje: Huë mae bae'iröhe ajoho ö'idöre rune vaejahue'e höromo raromoromo muebejarujeje ijonö biroho'irarijëro. Ëhi mae biroho'irarije jöho mami'e aehu Keriso-are jö ma hesi bëhi mae majëhijarevare evare jemë hejarijeje. <sup>6</sup>Jemesirire jiajëhi ëhi sa'ae aho'obëhe maja rojomajire beva'ajire ë jö maho majëhijego ae aho'obëhe ejahuobe marëbe va'ajeje. Ëhi jië'e mu maho jemesirohu'o rumorovë'eje. Jemëhu jö heromo God-are huë ma baeromo hesi bëhi avoho hejarije majare evare aevadeje. <sup>7</sup>Epaphras-ro ë jö maho aevo'i jemë majëhijadeje. Epaphras noro uehorovarue aëro jië'ëro no'o bimumoromo Badare muoho vaejahajeje. Huro no'o röromo jemesirire muoho birivoromo ajëmijajeje. <sup>8</sup>Huro uövuadeje: God-are Aru'ahëro jemesi dë vövöbajo'oho huotovëhë'ëro ae huë baejëvo avoharuje höjo. Jemesi jöho ëhi majahuijamu hejareje.

<sup>9</sup>Iae ëhuni jemesi jö hejarevare evare no aevoromo jemëni God-are örire uehorovobe rovaroho jaruvoho ëhi gemuoho ë'obe va'arueje. Ëhi ë'obe va'oromo noro God uavarueje huro jemë avohëvego hesi Aru'ahëhu simano ma bojamuijaje ëhi jië'e simanoho jemë'o mabëhe baeromo mue aho'obëhe avoho garomo ëhuro ga barë'irarijego God-hu diehi nimajoho.

<sup>10</sup>Ēhuro huhu nimajēhi jemēro ēhi vaejego Badaro jemē gēromo vuēvo avoho'irōhego. O jemē mu mae bövie bise'e vaeromo God bisemu gavarujoho gabe va'ujuvo ijonō ga avoho'irarijego. <sup>11</sup>Rōhu God-hu aji mare hiromo bojamuijaje biriroho ēho jemēro bövi mae bae avohoromo ēhuro huē mae huē sisē rabe rovego nimorohē'i biririvoromo mae riravo'irarijego. <sup>12</sup>Mae riravoromo Vavuoho huē mae ua'irarijego rabēni huro jemē avohēvamu hesi ariböviehu aji'e öri ari'ere va'o raromoromo mae baejaruēhi ēho jemē'o bae'irarijoho eni jëvë'ëro jië'ëro. Iae ēhuni no God ua gavarueje.

**Keriso aho'obēhe iosiramui'amaje a hesi aharire javuaje jōhoje.**

<sup>13</sup>Iae mae. God-ro no ajamuiromo ramoramo hesi vōröre raramaroho jiovaluoromo rinaguoromo hesi Harihu mabēhi hesi aharire ramuē'eje. <sup>14</sup>Ramuē'ego hesi Harihuro i'u'e mu sisēho tugohahuo'i hesi sasohē'e mu maho jiovaluoromo sisēho mu'uvahuadeje.

<sup>15</sup>Sisē mu'uvahuade aho Keriso God bogo gavarue a jiajēhi hu ēhi jië'ëro no hu garomo uvarueje: God ēhi hōjo. Hu Murioho jië'ëro God-hu bamade bövioho bise'o ho iosiramui'amoromo hu simanochoje. <sup>16</sup>Ēhesi bēhoho God-ro Keriso uavamu huro bövioho bise'o ho avoho'amadeje. Ö'idöre jiajohu'o sa'are jiajohu'o nunehu ga'amaruohu'o bogo ga'amaruohu'o simano vaeruomaje aru'aho masijohu'o vōrō baeruomaje aru'aho masijohu'o aho'obēhe God-ro uavamu avoho'amo barējadeje hesi muebe'amoröhēni. <sup>17</sup>Bövi bise'o bogo bamadevaroho Keriso hu urimo jiadeje. Huro aho'obēhe mueberomo ma'eno titimajeje. <sup>18</sup>Hu ekaresia nosi simanochoje no ma-hesi övo duruajo'e javuē'ëro. Hu ekaresia nosi bēhohoje. Hu aevo'i guomoromo ri'ōjadeje ēhuro aho'obēhe iosiramui'amoromo huro urimo nuniroho jioröhēni. <sup>19</sup>God-ro nimamu Kerisoro hesiro daruge uehore bövie bise'e bae barējē'eje. <sup>20</sup>God-ro ēhi nimē'ëro uvadeje: Na negajējo Kerisoro aho'obēhe nasinō sō rovego na'o huē mae jioruomorōhego. Kerisoro korosire iromoromo kōe rueromo guomego ēhuro God naro buore vaeromo bövie bise'e sa'are o ö'idöre jio'amajoho avoho'amego na'o huē mae garorovē'i raromorōhego. Na ēhi negajējo.

<sup>21</sup>Rōhu urimoho jemēro sisē'i uehorovoromo sisē vaejamu mue gö jëvë'ëro God-ariroho hahagu tariö'örovē'e jëvanovoromo God nu huodivaruje aribövie jëvadeje. <sup>22</sup>Jaruvoho bogo God nu huodivaruje aribövioho jëvo'i a'i God-ro hesi Harihoho nugö'ōjamu sino haho'e jioromo guomamu ēhuro God-ro jemē buore vaejëvoromo agane vaejëvadeje ēhuro jemē övövo rumo'e jö sisē rumo'e jëvo'i ma-maemu jëvego va'o hesi nunire mae riravo'irarijego. <sup>23</sup>Hesi nunire ēhi mae riravo'i nēgē'oho mae uehorovaruje jōho ēhuremu biririvoromo uehorovore. Urimo ë jö maho heromo uvarijeje: U'emu God'o gemu mae

raromo'ejarëjama huë mae jëvobe rovadeje. Ëhi uehorovobe rovarijoho nadi vuonugore. Ëjô maho sa'ae aho'obëhe maja rojomajire beva'ajire aëro majëhibe jijihô barëjë'ejô. Röhu ë jô hesi muoho naro vaejajeje.

**Paul-hu ekaresia ajëminövade jôhoje.**

<sup>24</sup>Naro jemë ajëmi'irodëni vi'ehi huë vavaeni bövi bise'o baebe rovodoho huë mae jeve. Noehu Keriso'o rôromo bae'irôhe vi'ehoho ëho naro ajamiromo nasi sinore bae'i hirohajeje hesi sino haho'oho naehu uëvaje hesi bëhoho hesi ekaresiaho mae jëvorôhego. <sup>25</sup>Ekaresiae jemë mae jëvorôhego God-ro ekaresia ajëmi'irode muoho nasi örire bojemi'ejë. Bojemiromo uevë'ejë naro hesi jôho majëhi barë'irodego. <sup>26</sup>Majëhi'irode jôho urimo God-ro ae aho'obëhe subivëhobe rovadoho jaruvoho hesi aribövioho rôjahuijë'ejë garôhego. <sup>27</sup>Ëjô urimo subivahuadoho God-ro hesi aribövioho rôjahui'i nimadeje noro garomo uvorôhego: Ëjôho aji mabëhe jië'ëro sa'a gö gö raje aho'obëhe hebe va'oromo ma-mabëhe raromoruomo'ajëjo. Ëjô hesi bëhoho Keriso jemë'o jie. Keriso jemë'o jië'ëro ëhu'ëro uvarujeje: U'emu hesi aji mare aji raromo'ejarëjo. Jôho ëhije. <sup>28</sup>Ëhu'ëro jië'ëro Keriso-are jôho ae aho'o majëhijarueje. Majëhiromo simane ma-mae uehorovoromo ae aho'obëhe rôjëhibe jijiharueje jô bëhoho heromo avo'avoho uehorovoromuorôhego. Avo'avoho uehorovobe va'oromo ëhuro ae gemu gemu aho'obëhe Keriso-are ae gemuho jioromo a duvahanö'e God-are nunire riravorôhego. <sup>29</sup>Ëhi mae riravorôhego ëhuni naro Keriso-are darugo bövi maho baeromo biririvoromo mu bôrömo bôröme vaemu vaeromo hesi jôho rôjëhijajeje.

**Sareri'e jô bogo ejëho'i Keriso-are jôhemu mae uehorovo'irôhe jôhoje.**

**2** <sup>1</sup>Röhu na nege jemëro ave jôho ga'irarijigo. Na muoho bogo bise'o vadu'oho vaejajeje ëhuro jemë'o Laodicea amo rajohu'o nasi nu ano'o bogo gevarue a ioro'iorohu'o ajëmi'irodëni. <sup>2</sup>Naehu mu vaejaje hesi bëhoho na nege jemesi dë vövöbajo'ohu'o jabesirohu'o biririvëho'irôhego. Jemë'o jabu'o huë baerovoromo rajahirovo'irarijigo. Jôho avoho heromo ëhuro mae uehorovoromo uvo'irarijigo: Jôho bogo sareri'ehu jio'i ma-mae gemu höjo. Ëhuro God-hu urimo subivëhade jô hesi bëhoho Keriso-are jôho ga'irarijigo. <sup>3</sup>Ae rahu Keriso-are bëhi gavë'oho ëhuro God-are nuni aji'e uehoro maho bôrömo mae biroho'anue. Ëhuremu jio'i biroho'irane öre gö bogoje.

<sup>4</sup>Na Keriso-are jô ëhi uëvaje hesi bëhoho ae göëro jemë sarerëmiromo vuëvo'e jôho majëhijigo mae höromo ejëhojööni uëve. <sup>5</sup>Röhu na rori'o hi'i röhu nasi uehoroho aho'o jemesirire jie. Ëhuro na jemë'o jevanove. Jemë'o hijanovoromo gavaje jemë biririvoromo gemuore riravoromo Keriso mae uehorovego göromo nimorohajeje.

**Keriso-are ae gemuohuro javuë'ëro ëhu'ëro bövi  
bise'o eni javuego mae raromarue jöhoje.**

<sup>6</sup>Röhu jemë aevoromo mae uehorovoromo uvarijeje: Iesu Keriso iae nosi börömoho höjo. Aevoromo hu mae uehorovarijëhi ëhi uehorovoromo hu'o gemu mae raromo jijihore. <sup>7</sup>Ije ö'e dirumu'ëro bibivajëhi o javu öbehu bibivo'amajëhi ëhi Keriso-are jöro dirumunö'e io'amoromo bibivo riravore. Ëhi'oromo röjëhijamu hejarije jöho birivoromo mae uehorovobe hesi öroro mabëhe uabe va'ore.

<sup>8</sup>Röhu aehu ëma sarerëmiromo uëvaruoho: Aveho nuni aji'e jö böröme hö uëvaruoho nadi ejëhoromo guaroho rireromanovore. Jabuhu atarue jöho ma-aëro jabesi uehorëro avohobe rovë'eje. Ave sa'a hesi jöhemu jië'ëro ëhuro Keriso-are jöho ahajeje. <sup>9</sup>Ëhuni jabesi jöho nadi ejëhore. Ëhesi bëhoho God-hu diehi jiajoho iae Kerisoro hesi sino haho'ere bae barëjë'eje. <sup>10</sup>O aru'aho mue gö gö jemëhu baejöro God-hu nimajoho iae eni bae barëjë'e jeve Keriso-are ae gemuohuro jëvë'ëro Kerisoro simano vaeruomaje darugo'e aru'ahe gö gö aho'o taemëvo'i huro gemuëro dö maroho jië'ëro.

<sup>11</sup>Jemë Keriso-are ae gemuohuro jëvë'ëro ëhu'ëro jemesi sino sisëho tarivëhanovë'eje. Ëhesi bëhoho bogo ma aehu Jew rajo muoho vaeromo sinoho tarivëhamu ëhuro God-are aribövie jëvo'i a'i Kerisoro jemesi sino hesi mu sisëho tarivëhë'eje God-are aribövie jëvoröhego. <sup>12</sup>Jemë bapataeto vaejarijevare evare Keriso guomamu hure bamarohuro ëhuro jemesi uehoro mamioho hu'o gemu mae guavëhë'eje ioro'ioeremu barëjëho'iröhego. Röhu God-ro darugoho bojamamu Keriso guomoromo ri'öjadeje. Édarugoho jemëro mae uehorovoromo ëhuro Keriso'o gemu mae ri'öromo uehoro i'oho baejarijeje. Bapataeto vaejarijevare ëhi jëvadeje. <sup>13</sup>Urimoho jemë mu sisëhemu uehorovonövarijeje. Mu sisëhemu uehorovoromo bogo Jew rajehu jëvo'i sa'a gö rajëro jëvë'ëro God-are jögoroho bogo baej'ëro ëhu'ëro jemesi dë vövöbajo'oho vuovëvanovadeje. Jaruvoho God-ro jemë Keriso'o gemu mae ajëmamu i'ovoromo ri'öromo uehoro i'e baej'e jeve. Röhu God-ro nosi sisëho aho'o uehorovoromo vuonugahuë'eje. <sup>14</sup>Urimo huro hesi jögoroho bojamuiromo uövuadeje: Ëhi ëhi ë'orëjo. Bogo ë'ë'oho i'ue bae'a'arujëjo. Ëhi uöromo gavade noro ë jögoroho ahamu gagorovo nosi ihoho jajivoromo uvadeje: Jabumë mu sisë ëhi ëhi vaej'ëro i'ue bae hesi jioruomajëjo. Ëhi ë'ë'ëro Keriso korosire guomadevare God-ro nosi sisëho uehorovoromo vuonugoromo nosi mu sisë jö surire jiajoho Keriso'o korosire ano taemoromo mu'uvahuadeje ëhuro mae javuoröhego. <sup>15</sup>Röhu majae gemuore Keriso korosire guomamu ëhuro aru'aho sisë ihe gö gö sa'a bövi bise'o muebe'amarue jabesi darugoho God-ro ruahö'ö'amoromo rori'o ujuoho ruruhö'öjadeje. Ruruhö'öromo ë sisë aribövioho söromo a nunire rovadeje ae aho'obëhe garöhego God-ro jabumë ruahö'öjëvë'e jiego.

<sup>16</sup> Vörö'e aru'aho sisëhu ave sa'are muebejëvoruomadoho ruahö'öjëvë'e jiaje ëhuni aehu ave sa'a hesi jögörohuremu uehorovoromo uëvaruoho: Ëioho jovoho bogave i'irarijëjo. ËJew rajo maja börömoho vadune göro göro manaere göro göro hurae göro göro ëhi rovego ëhi ëhi vaenövorëjo. Nosi jögöru bogo ejahuë'oho sisërëjëvo'ajë uëvaruoho nadi ejëhore. <sup>17</sup> Ëhi jië'e jögörohuro ëhuro God-are mu maehu rue'iröhohoho ëho no ma-sisë'i sisë'i maja aru'ahonö'e gavarueje. A'i Keriso gavë'ohuro ëhuro ë mu ma hesi bëhoho gavarueje. <sup>18</sup> Ëhuni aehu sarerëmiromomo uëvaruoho: No nia'ovo'iraeromo mu masijo masije gavë'ëro ëhu'ëro a masije javuajëjo. Ëhuni uëvaruëjo: Jemesi arijo'arije taemorovorëjo. Aneraho uvene aho røjëhinövorëjo. Nosi jö bogo ejahuarujohuni sisëro va'a'arujë uëvaruoho nadi ejëhore. Ëhi jië'e ariböviohuro sinehu nimaje mu sisëho uehorovoromo ma-döhemu nimoronimorohë'i jijihoruomajeje. <sup>19</sup> Bogo biririvoromo Keriso mae uehorovoruomajeje. Röhu Keriso hu simanoho jio'i no hesi övo hörü'oho javue. Hu simanoho jië'ëro muebejavuego övo hörü'oho jarömi umuogëro darugoho baerovoromo gemuoro bimumovoromomo God-hu ëhi ë'ojöro nimadëhi ëhi vaeromo böviraebe va'arueje. Ëhi jië'ëro Keriso nosi simanohoje röhu ë sisë aribövioho bogo biririvoromo simanoho Keriso'o gemuoroho bimumovorovoruomajeje.

**Keriso'o gemu mae vuovanovoromo mu mami vuonugo'i  
hu'o gemu mae ri'öromomo mu i'o baejare jöhoje.**

<sup>20</sup> Röhu jemë Keriso'o gemu mae bimumovoromo vuovëvamumu ave sa'a hesi mu jöho barëjëhadëje. Sa'a mu jö barëjëhadoho röhu jemë rabëni ave sa'a hesi mu uehorovarijoho bogo vuonugë'e ëhi gemuoho raromo jijiharujeje. Jemë rabëni aviëhi jië'e jöho ejëharujeje: <sup>21</sup> Aveho nadi ma'enorëjo. Ëho nadi irëjo. Aruëroho nadi rëhorëjo. <sup>22</sup> Ëhi jië'e jögöroho ma-i hesi jögore o inömo hesi jögoreje. I ijë'oho barëjajeje. O inömo baeromo mu vaejë'oho ëhuro ma-sisërë'amajeje. Ëhi sisërë'amoröhe inömo bövi bise'oho hesi jögöroho ma-aëro bojëmiromomo røjëhiruomajeje. <sup>23</sup> Røjahi'iramu uvo'a'anue: Jabesi jöho nani simano ma'e jöe höjo. Ëhesi bëhoho jaburo uvarueje: Uehore aho'o bojamiromomo aru'aho masijoho uvene aho røjëhinövorëjo. Arijo'arije taemorovonövorëjo. Sino haho'oho ijumorovonövorëjo. Röhu jabesi jöho ma-döemumu maeje. Ejëhë'oho bogo ëhuro sinehu nimaje mu sisëho aharueje.

**3** <sup>1</sup> Röhu Keriso guomoromo ri'öjadohu'o gemu mae ri'öjë'e jëvaje ëhuni Kerisohu God-are övo manö böröme hijajire döre jiaje muoho bövioho bise'oho ëhemumu uehorovore. <sup>2</sup> Nadi ave sa'a hesi mu sisëho uehorovo'i döre jiajohemumu ëhemumu uehorovore. <sup>3</sup> Jemesi mu sisë hesi darugoho ioro'ioremu barëjëhë'eje. Ëhuro vuovëvanovë'eje. Jemë vuovëvanovamumu Keriso'o bimumovorovë'ëro jemesi darugo i'oho God-arire gurihijë'eje. <sup>4</sup> Ëhi'obe va'öjuvu hujeji Keriso darugo bojëmijaje aho

va'orahoro ruel'ë'e. Rue'iramu evare jemëro hu'o va'orahoro riravoromo hesi ajoho gemu mae bae'a'aruje.

**Mu mami vuonugo'i mu i'o vaenövo'iröhe jöhoje.**

<sup>5</sup>Ëhuni sinehu nimaje mu sisëho mu'ure. Öehu jijihanovarujoho va'inumi'e mu vaejarujoho jemesi dëre uehoro sisë ri'öjego nimarujoho ëhi jië'e muoho mu'u'amore. Röhu avare inömemu nimaruje muoho mu'ure. Avare inömemu nimarue mu hesi bëhoho God dejonö bamo'i inömo sisë nuninö bamarue muohoje. <sup>6</sup>God-are jö bogo eruomaje ariböviohuro ëhi jië'e mu sisëho vaeruomajego ëhuni God-are vöröhuro jabumëni ruel'ë'e. <sup>7</sup>Urimoho jemë'o ëhi jië'e ariböviohu'o gemuore jijihoromo ëhi jië'e mu sisëho vaenövarijeje.

<sup>8</sup>Röhu avevejö'oho aviëhi jië'e mu sisëho aho'obëhe vuonugore. Dë vörönimarujoho vörö'iraejarujoho uehoro sisë baejarujoho ëhi ë'arujoho vuonugore. Ae gö jabesi iho ijumarujoho javoji'e jö sisë atarujoho bogave jemesi jö'oroho suorovo'i. <sup>9</sup>Nadi göëro göho sareramirovore rabëni hesi bëhoho uehoro mami jëvo'ego mu sisë vaenövarijoho vuonugo'i <sup>10</sup>uehoro i'e baejë'e jëvaje. Ëuehoro i'oho God-ro aevoromo bojëmadeje. Bojëmijë'ëro ë uehoroho huro avohëhobe va'ajeje huhu uehorovajëhi ëhi uehorovojöro ëhuro jemëro hu avoho ga'irarijego. <sup>11</sup>Uehoro i'ëro jëvë'ëro jemë bogo aho adovoromo uvo'a'aruje: Jew rajoho gö javuo'i sa'a ioro'ioro rajoho gö javuajëjo. Jew rajo mu vaeromo sino tarivahuë'e aribövioho gö javuo'i sino bogo tarivahuë'e aribövioho gö javuajëjo. Huë gö aribövioho o rori'ere aribövioho gö javuajëjo. O ae gö jabesi muemu vaejëharue aribövioho gö javuo'i nosi nimoro mu vaejarue aribövioho gö javuajëjo. Ëhi jië'e muoho iae barë'i jemë ae aho'obëhe Keriso-are aribövie gemuoho jëve. Hu ae aho'obëhe jemesirireje.

<sup>12</sup>God-ro jemë hesi baejëvë'ëro jemë hesi aribövi maemu jëvego huro jemë dë vövöbajo'e aho'o uehorovëvajeje. Ëhuni huë baeromo a ajëmi'irarije muoho baere. Nadi sivuoho uehorovoromo bövioho riravo'i ma-sanuovoromo muoho vaere. Ae göehu huë sisë bojëmijë'ëro biririvoromo ma-nunëremu ga taemore. <sup>13</sup>Göëro göho garomo nadi nuoho huodivorovo'i jabu'o ma-raromore. O uvë'iroho: Ae göëro mu sisë vaejade hö uvë'iroho göëro gö hesi sisëho uehorovoromo vuonugore. Badahu jemesi sisë uehorovoromo vuonugadëhi jemë'o ëhi ë'ore. <sup>14</sup>Ëhi jië'e muoho vaejë'i röhu ave muohuremu avoho ma'enore. Göëro göho dë vövöbajo'e aho'o uehorovore. Dë vövöbajo'e aho'o uehorovë'o'oho mu mae aho'obëhe avo'avoho vaenövo'aruje. <sup>15</sup>Röhu Kerisoro ajamuijego nosi dë vövöbajo'e mae javuego gemuoro mae raromarueje. Jemëro ëhi gemuoro mae raromo'irarijego ëhuni God-ro gagovëvadeje sino haho'e gemuoho jëvojöro. Ëhuni ë muohuremu nunoro bamoromo uvore: No muoho ëhi ëhi vae'ejärëjo. O God-hu suvuoro gö gö bojëmijajoho nadi ëma

nunëremuoho ga'i uvore: God-ro suvuoro mabêhe bojamujê'e hö uvore.  
 16 Rôhu Keriso-are jôho mabêhe jiaje ë jöhuremu uehorovore. Ejôho uehorovoromo simano mae bae avohoromo ôroho rôjahirovoromo jögore mamirovore. Ehi'oromo uvore: God-ro mae vaejavuajê uvê'i Psalms surire jajivare jôho God rajahi'irôhe jôho Aru'ahehu bojêmaje jöe gö gö iore.  
 17 Jemê jö atê'oho mu vaejê'oho o rabe rabe ê'ê'oho God Vavuoho Bada Iesuare ihore huê mae uavê'i mue aho'o Bada Iesuare ihoro vaenövore.

### Aehu diehi avo'avoho garorovo'irôhe jôhoje.

18 Rôhu vaboroharo jemesi baru jabesi jôho ejêhonövore. Jö ejêhê'oho iae maeje jemê Badare magonahëro jêvê'ëro.

19 O baruoharo jemesi vaboroho rajêhire. Rajêhiromomo nadi sisê'ioho vaejêvore.

20 O aboji harihu'oharo jemesi vëmu vavu'o jabesi jôho aho'o ejêhonövore ehi ê'ê'oho Badaro nimaje jiaje.

21 O vëmu vavu'oharo aboji harihu'oho nadi huê sisêho bojêminövore. Huê sisê bojêmibe va'ê'oho jabesi uehoroho u'uhêho'ê'e.

22 Ae gö jabesi muemu vaejêharuje aribövioharo jemesi masijoho ejêhonövore. Nadi ma-döemuoho ejêhorego jemesi masijohuro jemê gëromomo mae uehorovëvo'irôgoro a'i Bada uehorovoromo jabesi ôroro uhohu'o mae ejêhonövore. 23 Ejêhoromo mu rabe rabe vaejê'oho uvore: Bogo ma-a jabesi muoho vae'i na Badare mue vaejajëromomo dë vövöbajo'e aho'o avoho uehorovoromo muoho vaere. 24 Mu ma vaejê'oho Badare ariböviehu bae'irôhe suvuoroho huro jemê'o mana bojêmi'ê'e. Ehuremu uehorovore. Ehesi bëhoho ae gö jabesi mu vaejê'oho ehuro Keriso jemesi bövi hesi muohu'o vaejarujeje. 25 O mu sisê vaejê'oho ë mu sisê hesi manaho bae'a'aruje. God-ro bogo gö nimo'i gö bijönimo'i a'i ma-gemu uehorovavuajeje.

**4** 1 O simano vaejaruje aribövioharo jemesi muemu vaejêhoruomaje aribövi jabesi ôroro avo'avoho vaejêvore. Uvore: Bogo jabumëremu a'i no'o Simano Vaejavuaje Ae iae ô'idöre jiajêjo.

### Birivoromo God-are ôrire jö jövoromo mu avo'avoho vaenövo'irôhe jôhoje.

2 Rôhu God-are ôrire jö atê'iroho nadi u'uvu'o'i a'i birivoromomo nune jioromomo hesi ôroro mabêhe uaromomo jôho atore. 3 God-are ôroro jôho atoromomo rôhu nosi jöëni ëninamirego huro nosi ôroho jiovahuo'iro no Keriso-are jö subivahuadoho ae huruoho majêhi'irôhe. Ejö majêhijajohuni ehuni aëro savoji gagore ba'amevê'ëro hijajeje. 4 Eëninamirego na ë jö hesi bëhoho avo'avoho huruoho majêhi'iro aëro ma-mae heruomorôhe. Naeu ehi ê'ê'oho iae maeje.

5 O Keriso-are jö bogo heruomaje ariböviohu'o gemuore raromë'iroho simanomomo avoho uehorovoromomo jabu'oho raromomo jijihore. Jabu'o

raromoromo röhu majae eni jiamu gavè'iroho nadi ëma raromo'i a'i biririvoromo jabesi öroro avoho ajëmire. <sup>6</sup>Röhu jemëhu jabu'o jö atè'o'oho jemëro vuëvo'e jö mahemu atore. Ëhi jië'e jö atè'o'oho ëhuro he'irarije aëro Keriso-are jö bëhoho he'i uë gëvamu hejë'o'oho ae gemu gemu avoho majëhibe va'a'aruje.

### Ijo tugoho'i jejëmijare jöhoje.

<sup>7</sup>Tychicus-ro ö'oromo naehu rabe rabe ë'aje jöho majëhi'iramu he'a'aruje. Hu nosi huë baerovarue öeje. Hu no'o bimuvoromo Badare muohemu vaejahajeje. <sup>8</sup>Ëa naehu nugö'ö'ië'aje hesi bëhoho huro ö'oromo jöho majëhijego noehu diehi raromarue jöho jemëro hejego dë vövöbajo'o'oho mae jëvoröhego ëhuni nugö'ö'ië'e. <sup>9</sup>Röhu Onesimus-ro Tychicus'o gemu mae ö'ë'e. Onesimus nosi huë baerovarue öhuro jië'ëro biririvoromo Keriso mae uehorovajeje. Hu jemesi ae gemuhoje. Tychicus'o Onesimus'o niö'iro noehu rabe ë'aruoho majëhi barë'iramu he'a'aruje.

<sup>10</sup>Röhu na'o savoji gagore hijaje aho Aristarchus-ro jemesi örire jejëmije. O Mark Barnabas-are muenohuro jejëmije. Röhu Mark ö'ë'o'oho jejamiromo uare: Nosi osaro ro hijëjo. Ëjöhö na mami'e bojëmamü gavarijeje. <sup>11</sup>Röhu Joshua iho göho Justus hu'o jemesi örire jejëmije. Aristarchus o Mark o Joshua ë Jew rajoho niö'i gemu jaburo sivue na'o bimuvoromo God-hu muebejaje öri ari'o hesi muoho vaejarueje. Vaeromo ma-mabëhe ajemijë'ejö. Jew rajo ioro'ioroho bogo ajemijarueje.

<sup>12</sup>O Ephras jemesi ae gemuoho Iesu Keriso-are mu vaejahaje ahuro jemesi örire jejëmije. Huro jemesi jöëni börömo mae biririvoromo God-are örire ëninamijajeje huro ajëmego jemëro a duvahonö'e biririvoromo riravoromo hesi jöho uhohu'o ma-mae hö uehorovoromo huhu rabe rabe nimajëhi ëhi ejaho barë'irarijego. <sup>13</sup>Ëhi ëninamiromo mu börömo böröme vaejajeje jemë'o Laodicea amo rajohu'o Hierapolis amo rajohu'o ajëmi'iröhëni. Mu böröme vaejamu gavë'ëro naro majëhije. <sup>14</sup>Röhu oso muebejaje ae nosi huë baerovaruoho Luke o Demas jabu niö'iro jemesi örire jejëmijö.

<sup>15</sup>O Laodicea raromarue Christian ö mueno'ohu'o jejëmijode höre. O Nympha nasi Christian ma'ine o hesi osare ro gagovoruomaje ekaresiahu'o jejëmijode höre. <sup>16</sup>Röhu ave surire jö baeromo adahë'iroho suroho nugö'öromo Laodicea amo rajoho uëregö jabu'o adaho'irovo. O naehu Laodicea amore nugö'öjode suroho jabuhu jemëni nugö'öjë'iroho jemë'o ëho adahore. <sup>17</sup>Röhu Archippus uare: Badahu bojamade muoho avo'avoho uehorovoromo vae barënjö. Ëhi uane.

<sup>18</sup>Röhu ave jöho naro nasi övëro jajive gare. Paul naro jemesi örire jejëmije. Na savoji gagore hijaje jöho nadi rumonimore.

God-ro jemë huë baeromo ajëminövo'ë'e. Ahia mino'e.